



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 58, datë 23.12.2020

PËR VLERËSIMIN DHE PIKËZIMIN E KANDIDATURËS SË Z. PËRPARIM KALO NË VENDIN VAKANT PËR GJYQ TAR NË GJYKATËN KUSHTETUESE, SHPALLUR NGA PRESIDENTI I REPUBLIKËS NË DATËN 07.02.2018, RISHPALLUR NË DATË 27.09.2019 DHE RISHPALLUR NË DATË 24.09.2020

Këshilli i Emërimeve në Drejtësi, i përbërë nga :

Vitore Tusha	- Zëvendëskryetare
Fiona Papajorgji	- Anëtare
Arta Marku	- Anëtare
Miranda Andoni	- Anëtare
Saida Dollani	- Anëtare
Ludovik Dodaj	- Anëtar
Fatjona Memçaj	- Anëtare

Asistuar nga sekretare **Ermelinda Kadiu**.

Me praninë e Avokates së Popullit, znj. **Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z. Bledar Dervishaj dhe Katrin Treska**, përfaqësues të autorizuar të Presidentit të Republikës,

- **zonjës Mimoza Arbi**, përfaqësues e autorizuar e Kryetarit të Kuvendit,

në mbledhjen e datës **23.12.2020**, mori në shqyrtim çështjen që i përket:

**KANDIDAT PËR GJYQ TAR
NË GJYKATËN KUSHTETUESE:**

Z. Përparim Kalo

OBJEKTI:

Vlerësimi dhe pikëzimi i kandidaturës së z. Përparim Kalo, në vendin vakant për gjyqtar në Gjykatën Kushtetuese, të Presidenti i Republikës në datën 07.02.2018, rishpallur në datë 27.09.2019 dhe rishpallur në datë 24.09.2020

KËSHILLI I EMËRIMEVE NË DREJTËSI

Pasi dëgjoi relatimin e anëtares relatore të Këshillit, **znj. Vitore Tusha**, mendimin e paraqitur nga **Avokati i Popullit, znj. Erinda Ballanca**, në cilësinë e vëzhguesit të përhershëm në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi.

VËREN:

I. Rrethanat e çështjes

1. Këshilli i Emërimeve në Drejtësi, me Vendimin nr. 50, datë 11.12.2020, ka vendosur lejimin e kandidimit të kandidatit Përparim Kalo për gjyqtar në Gjykatën Kushtetuese, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018, rishpallur në datën 27.09.2019 dhe rishpallur në datën 24.09.2020.

2. Në zbatim të dispozitave të ligjit nr. 8577/2000 dhe të ligjit nr. 115/2016, si edhe atyre të Kreut IV (pikat 27-38) të vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, anëtarja e Këshillit, znj. Vitore Tusha, në cilësinë e relatorit të vendit vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018, rishpallur në datën 27.09.2019 dhe rishpallur në datën 24.09.2020, ka realizuar veprimet përgatitore të procedurës së vlerësimit dhe pikëzimit të kandidatëve, njëkohësisht me procedurat e verifikimit të tyre.

3. Bazuar në aktet që janë dorëzuar nga kandidati Përparim Kalo në momentin e kandidimit dhe gjatë fazës përgatitore të procedurës së vlerësimit, anëtarja e Këshillit relatore në vendin vakant në të cilin ky kandidat ka paraqitur kandidaturën e tij, hartoi relacionin përkatës për gjetjet në procedurën e përzgjedhjes dhe të vlerësimit të këtij kandidati për gjyqtar në Gjykatën Kushtetuese.

4. Në përfundim të procedurave të verifikimit të të gjithë kandidatëve për këtë vend vakant, relatorja, ka njoftuar zv/Kryetaren dhe kanë paraqitur për shqyrtim në mbledhjen e Këshillit, relacionin dhe dokumentacionin e përgatitur për secilin kandidat të vendit vakant lidhur me procedurën e përzgjedhjes dhe vlerësimit të kandidaturave.

5. Këshilli i Emërimeve në Drejtësi, pasi shqyrtoi procedurat e ndjekura gjatë veprimeve përgatitore nga relatorja dhe plotësinë e dokumentacionin të paraqitur për vlerësim nga secili kandidat, dëgjoi mendimin e Avokatit të Popullit lidhur me mënyrën e procedimit të ndjekur për përgatitjen e dokumentacionit të kandidatëve, me Vendimin nr. 55, në datën 22.12.2020 ka vendosur fillimin e procedurave të vlerësimit, pikëzimit dhe renditjes së kandidatëve të lejuar për:

- a) *vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018, rishpallur në datën 27.09.2019 dhe rishpallur në datën 24.09.2020.*

6. Në datën 22.12.2020 Këshilli ka zhvilluar procedurën e intervistës me këtë kandidat mbi motivimin e kandidimit.

7. Lidhur me nivelin e zotërimit të gjuhëve të huaja nga kandidati i lejuar, z. Përparim Kalo, në përgjigje të njoftimit të Këshillit të datës 15.12.2020, të dërguar në rrugë elektronike, ka përzgjedhur gjuhën angleze dhe italiane. Këshilli, nisur nga eksperiencia dhe përvoja personale e kandidatit, si dhe bazuar në faktin se kandidati ka paraqitur shumë punime në gjuhën angleze, si dhe ka kryer master tre vjecar në gjuhën angleze, vlerësoi që të mos caktojë ekspert për këtë kandidat.

II. Vlerësimi i Këshillit të Emërimeve në Drejtësi

8. Në përfundim të intervistës, bazuar në të dhënat e nxjerra nga biseda mbi motivimin e kandidimit, si edhe bazuar në aktet dhe dokumentet që janë dorëzuar nga kandidati Përparim Kalo në momentin e paraqitjes së kërkesës për kandidim, dokumente të paraqitura prej tij sipas kërkesave të Këshillit, si edhe shkresa dhe të dhëna të tjera kërkuara apo të ardhura zyrtarisht nga institucione të ndryshme, Këshilli ka vënë në bisedim vlerësimin dhe pikëzimin e kandidatit Përparim Kalo për secilin nga kriteret e vlerësimit të përcaktuara:

- a) në pikën 4 dhe 5 të nenit 125 të Kushtetutës;
- b) në nenin 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuar, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit nr. 115/2016;
- c) në detajimin e mëtejshëm të kriterëve ligjore të posaçme dhe të përgjithshme të vlerësimit dhe përcaktimit më të hollësishëm të peshës specifike të tyre në pikëzimin dhe renditjen e kandidatëve të treguar në Kreun II, në Kreun V dhe në Shtojcën 1 të Vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”;
- ç) në shpjegimet e hollësishme lidhur me metodologjinë mbi të cilin bazohet në vlerësimi dhe caktimi i pikëve të miratuar nga Këshilli i Emërimeve në Drejtësi me vendimin nr. 51 datë 21.06.2019 “Për miratimin e metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese”.

A. Meritat profesionale – Historiku Arsimor dhe Profesional

Vjetërsia në profesion

9. Në shkronjën “a” të pikës 3 të nenit 7/a të ligjit nr. 8577/2000, përcaktohet si kriter vlerësimi “*Vjetërsia në profesion*”. Ndërkohë që, sipas nenit 125 të Kushtetutës dhe nenit 7/a pika 2 shkronja “a” të ligjit nr. 8577/2000, përbën kusht lejimi kandidimi që kandidati të ketë së paku 15 vjet përvojë profesionale si gjyqtarë, prokurorë, avokatë, profesorë ose lektorë të së drejtës, nëpunës (jurist) të nivelit të lartë në administratën publike.

10. Prandaj, Këshilli vlerëson me pikë kohëzgjatjen për më shumë se 15 vjet të këtyre fushave të përvojës profesionale të secilit kandidat, në maksimum deri në 4 pikë, sikurse orientohet në tabelën e përshkallëzuar të pikëzimit të vjetërsisë në profesion të treguar në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

11. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezultoi që kandidati Përparim Kalo, ka ushtruar veprimtaritë profesionale si më poshtë:

- 1994 – 2020 Shërbime ligjore Zyra e avokatisë Kalo & Associates
- 1994 – 1994 Shërbime ligjore në fushën e sigurimeve INSIG Tiranë
- 1991 – 1993 Inspektor për Noterinë dhe Zyrat e Hipotekës Ministria e Drejtësisë
- 1980 – 1990 Mësimdhënie Shërbime ligjore Shkolla Ushtarake Zall Herr

12. Mbështetur në të dhënat e sipërcituara, rezulton se në rastet e veprimtarive sipas shkronjës “c” dhe “ç” të pikës 15, kandidati Përparim Kalo ka ushtruar veprimtari profesionale në fushat e përcaktuara sipas nenit 125 të Kushtetutës dhe nenit 7/a të ligjit nr. 8577/2000. Ndërsa veprimtaritë sipas shkronjave “d” dhe “dh” janë të përfshira në të njëjtën periudhë kalendarike. Prandaj, në momentin e vlerësimit, ky kandidat ka gjithsej mbi **26 vjet** vjetërsi në punë.

13. Për këto arsye, për kriterin e vlerësimit “vjetërsia në profesion”, nisur nga ushtrimi i veprimtarive profesionale në një kohëzgjatje prej 26 vjet, Këshilli çmoi ta vlerësojë kandidatin Përparim Kalo me **3 (tre) Pikë**.

Historiku Arsimor

14. Në shkronjën “d” të pikës 3 të nenit 7/a të ligjit nr. 8577/2000, përcaktohet si kriter vlerësimi edhe ecuria gjatë kryerjes së arsimit të lartë me një notë mesatare jo më pak se 8 ose të barasvlefshme me të, ndërkohë që edhe shkronja “c” e pikës 1 të nenit 240 të ligjit nr. 115/2016 kërkon të vlerësohen rezultatet gjatë studimeve në ciklet e arsimit të lartë.

15. Prandaj, Këshilli vlerëson me pikë ecurinë gjatë kryerjes së arsimit të lartë me një notë mesatare jo më pak se 8 ose të barasvlefshme me të për secilin kandidat, sipas përshkallëzimit me 1 pikë të notës mesatare mbi 8 dhe me 2 pikë të notës mesatare mbi 9, sikurse orientohet në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

16. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Përparim Kalo ka përfunduar studimet dhe është diplomuar në vitin 1989 si jurist, në Fakultetin e Drejtësisë të Universitetit të Tiranës. Në zbatim të ligjit nr. 80/2015 ky lloj arsimimi kualifikohet si arsim i lartë juridik, Diplomë e Nivelit të Dytë.

17. Sipas certifikatës së notave të lëshuar nga Fakulteti i Drejtësisë, Universiteti i Tiranës dhe vetëdeklarimi i bërë nga kandidati Përparim Kalo, rezulton se ka përfunduar studimet universitare me notë mesatare 8.15.

18. Për këto arsye, për kriterin e vlerësimit “historiku arsimor”, nisur nga nota mesatare **8.15** e arritur gjatë studimeve dhe diplomimit në Fakultetin e Drejtësisë të Universitetit të Tiranës, Këshilli çmoi ta vlerësojë kandidatin Përparim Kalo me **1 (një) Pikë**.

Kualifikime Pasuniversitare

19. Në pikën 3 të nenit 7/a të ligjit nr. 8577/2000 dhe pikat 1 e 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohen si kritere vlerësimi pasja e titujve

akademikë, gradave shkencore, ecuria dhe kryerja kualifikimeve pasuniversitare, studimeve dhe specializimeve afatgjata (përfshirë Shkollën e Magjistraturës), si edhe kryerja e trajnimeve afatgjata dhe afatshkurtra në fushën e të drejtave kushtetuese, të drejtave të njeriut, si edhe në fusha të tjera të së drejtës.

20. Prandaj, në zbatim të ligjit, Këshilli i Emërimeve në Drejtësi vlerëson me pikë llojin e titujve akademikë dhe gradave shkencore, llojin, kohëzgjatjen, fushën dhe vendin e kryerjes së kualifikimeve pasuniversitare, studimeve, specializimeve dhe trajnimeve të kandidatëve, duke pasur parasysh shpërndarjen e pikëve sipas vendimit nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

21. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Përparim Kalo ka ndjekur studimet pasuniversitare për filozofi, Fakulteti i Shkencave Politike Juridike Universiteti i Tiranës në vitin 1989 me vlerësimin Pozitivisht (me notën mesatare 10), kualifikim pasuniversitar për gjuhën italiane Fakulteti i Gjuhëve të huaja Universiteti i Tiranës (me notën mesatare 7). Në vijim, ka ndjekur studimet pasuniversitare Master në të Drejtën Tregtare Amerikane e Globale Suffolk Law School, Suffolk University, Boston, SHBA në periudhën 2006 – 2009 dhe me vlerësimin Pozitivisht (nuk aplikohet vlerësimi me notë). Për këtë të fundit kandidati edhe pse ka depozituar dëshiminë përkatëse nuk ka paraqitur në Këshill ekuivalentimin e masterit pranë institucioneve përkatëse.

22. Për këto arsye, edhe pse kandidati ka kryer studimet e masterit, duke qenë se nuk ka paraqitur asnjë dokument për njohjen e këtij studimi, Këshilli çmoi ta vlerësojë kandidatin Përparim Kalo me **0 (zero) Pikë**.

23. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Përparim Kalo ka ndjekur 20 veprimtari trajnimi afatshkurtra, në pjesën dërmuese të tyre në Këshilli i Evropës Strasburg, Danimarkë, Belgjikë, Paris, Austri, Itali, dhe Tiranë. Tematika e një pjesë të këtyre veprimtarive lidhet me të drejtat e njeriut, procesin e rregullt ligjor, të drejtën e falimentit, etj.

24. Duke pasur parasysh numrin, llojin, kohëzgjatjen dhe tematikat e veprimtarive trajnuese të ndjekura nga kandidati Përparim Kalo, për këtë kriter ligjor vlerësimi Këshilli çmoi ta vlerësojë me **2 (dy) Pikë**.

Njohja e gjuhëve të huaja

25. Në shkronjën “c” të pikës 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi niveli i zotërimit të gjuhëve të huaja.

26. Prandaj, në zbatim të ligjit, Këshilli i Emërimeve në Drejtësi vlerëson me pikë llojin dhe numrin e gjuhëve të huaja, si edhe nivelin e zotërimit të tyre nga ana e kandidatëve, duke pasur parasysh sasinë e pikëve maksimale përkatëse sipas vendimit nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe

caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

27. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezultojnë që kandidati Përparim Kalo zotëron dy gjuhë të huaja, Anglisht dhe Italisht. Sipas deklaratës të kandidatishtit niveli i zotërimit të të dy gjuhëve të huaja është “shumë mirë” në të tre komponentët: të kuptuarit, të folurit dhe me shkrim. Për njohjen e gjuhëve të huaja janë paraqitur edhe dokumentet e lëshuara për zotërimin e tyre, ndërkohë që kandidati ka ndjekur me kohë të plotë studimet afatgjata pasuniversitare 3 vjeçare në gjuhën angleze, në periudhën 2006 – 2009 Master në të Drejtën Tregtare Amerikane e Globale Suffolk Law School, Suffolk University, Boston, SHBA.

28. Këshilli vlerësoi se intervista dhe biseda me ekspertët e gjuhës së huaj, edhe pse është pranuar të zhvillohet nga kandidati, nuk është e nevojshme për sa kohë ky kandidat ka ndjekur studime afatgjata pasuniversitare 3-vjeçare në gjuhën angleze dhe ka paraqitur dokumentacion provues në lidhje me zotërimin e gjuhëve të huaja.

29. Për këto arsye, duke pasur parasysh faktin që kandidati Përparim Kalo zotëron edhe gjuhën angleze me të cilën ka ndjekur me kohë të plotë edhe studimet afatgjata pasuniversitare 3 vjeçare pranë Globale Suffolk Law School, Suffolk University, Boston, SHBA, Këshilli çmoi ta vlerësojë kandidatin Përparim Kalo për këtë kriter ligjor vlerësimi, në total me **4 (katër) Pikë**.

B. Meritat profesionale – Kualifikimi i Përgjithshëm Profesional

30. Në shkronjën “ç” të pikës 3 të nenit 7/a të ligjit nr. 8577/2000 dhe në shkronjën “a” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e përgjithshëm profesional, përcaktohen si kritere vlerësimi, në bazë të treguesve shkencorë, performanca e dalluar dhe rezultatet e larta në ushtrimin e profesionit, që mbështetet ndërmjet të tjerave në botimet dhe artikujt shkencorë në fushën juridike, në produktet profesionale sipas profileve të ushtrimit të profesionit, rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e dallueshme të arritura gjatë përvojave të tyre të punës e që lidhen me ushtrimin e funksioneve në fushën përkatëse.

31. Prandaj, në zbatim të ligjit, Këshilli i Emërimeve në Drejtësi vlerëson me pikë si sasinë ashtu edhe cilësinë e rezultateve profesionale, me një fokus të veçantë tek cilësia. Në këtë mënyrë, bazuar në të dhënat e mundshme të disponueshme për vlerësim, mbahen parasysh sasia e pikëve maksimale prej 30 pikësh sipas vendimit normativ nr. 5 datë 02.04.2019 të këtij Këshilli, si edhe orientimet për caktimin e mundshëm të një maksimumi prej 25 pikësh për sa i përket vlerësimit cilësor dhe të një maksimum prej 5 pikësh për vlerësimin e sasisë së rezultateve profesionale sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

32. Në rastin e kandidatishtit Përparim Kalo, Këshilli shqyrtoi dokumente profesionale dhe të dhënat që mund të disponoheshin nga veprimtaria e tij profesionale si Avokat, si edhe nga

kontributet e tjera profesionale të këtij kandidati në veprimtari të ndryshme, përfshirë publikime apo punime e artikuj shkencorë.

33. Për sa i përket *vlërësimit sasior*, krahas të dhënave që rezultojnë nga jetëshkrimi Këshilli shqyrtoi dhe dokumentacionin e paraqitur nga vetë kandidati.

34. Gjithashtu, nga dokumentacioni i administruar rezulton se kandidati Përparim Kalo, në cilësinë e autorit apo bashkëautorit, ka përgatitur 30 publikime dhe artikuj të tjerë profesional, si brenda ashtu edhe jashtë vendit, të cilat janë të fokusuara si në fushën e drejtësisë kushtetuese, ashtu edhe në fusha të tjera të së drejtës, sikurse tregohen më poshtë:

a) Publikime profesionale dhe kërkime shkencore:

1. Arbitrazhi dhe Ndërmjetësimi Bashkëautor: me Tefta Zaka dhe Paul Emond Subjekti botues/publikues: Shkolla e Magjistraturës Koha e botimit: Tiranë 2007.
2. Fjalor Terminologjik i Drejtësisë Shqip-Englisht/Englisht-Shqip Bashkëautor: Alban Çausi, Vilsa Dado, Ardiana Shehi Institucioni botues/publikues: Fondacioni Soros dhe "HORIZONT" Koha e botimit: Tiranë 2002
3. Manual për Ligjin shqiptar për Kolateralin Anëtar i grupit të punës Institucioni botues/publikues: Banka Botërore Koha e botimit: 2001
4. Statusi i Investitorit Strategjik Autor: Përparim Kalo Subjekti botues/publikues: Neësletter KALO & ASSOCIATES 2017
5. Ndërhyrje e nxituar dhe jo e mirëmenduar Bashkëautor: me Aigest Milo Institucioni botues/publikues: Revista Avokatia 2018
6. Ndihma ligjore në Mosmarrëveshjet Ndërkombëtare Autor: Përparim Kalo 1999
7. Për një shtet të së Drejtës Evropiane, Vendime të zgjedhura te GJEDNJ Kontribues: Përparim Kalo Këshilli i Evropës/Qendra Shqiptare e të Drejtave të Njeriut 2001
8. Transaksionet financiare të siguruara Kontribues: Përparim Kalo Banka Botërore 1999
9. Byroja Shqiptare e Sigurimit të Automjeteve në Këshillin e Byrove Autor: Përparim Kalo Revista IBA 1993
10. Sigurimet në Shqipëri - biznes për t'u rikonsideruar Autor: Përparim Kalo Revista IBA 1995
11. Sistemi i ri shqiptar i financimit të siguruar -hap në drejtimin e duhur Bashkëautor: me Yair Baranes, Drejtor i IRIS Eastern European Forum Neësletter 2000
12. Shqipëria, Treg në tranzicion Kontribues: Sead Miljkovic Top Legal International 2010
13. CEE studim: Tregjet në zhvillim Kontribues: Dieter Spranz Top Legal International 2010
14. Kostoja e reformës shqiptare në drejtësi Autor: Përparim Kalo Legal Neësletter KALO & ASSOCIATES 2013
15. Kujtime të 20 viteve në sfond rozë Autor: Përparim Kalo Revista JAVA 2014
16. Çfarë pritet nga Gjykata Administrative Autor: Përparim Kalo Revista Monitor 2013
17. Reforma në drejtësi, gota gjysmë e zbratur Autor: Përparim Kalo Revista Java 2013
18. Arbitrazhi, aty ku Shqipëria humbet miliona Autor: Përparim Kalo Revista Java 2012
19. Integrimi në BE - ëndërr e bërë realitet Autor: Përparim Kalo Legal Neësletter KALO & ASSOCIATES 2007
20. Udhëzues Arbitrazhi dhe Gjykimet Ndërkombëtare Autor: Përparim Kalo 2000
21. Ndërmarrjet e përbashkëta në Shqipëri Bashkëautor: Përparim Kalo 1999

22. Njohja dhe zbatimi i vendimeve të gjykatave të huaja dhe vendimeve të arbitrazhit
Autor: Përparim Kalo 1999
23. Agjencia Shqiptare e Garancisë Autor: Përparim Kalo 1998
24. Rënia e skemave piramidale dhe roli i drejtësisë Autor: Përparim Kalo IBA
Neësletter 1997
25. Hartimi i teknikave të Negocimit Përparim Kalo IDLI 1996
26. Avokatët, Franz Kafka Përkthim nga: Përparim Kalo Institucioni botues/publikues:
Alternativa 1993
27. Problemi i ligjeve tona, Franz Kafka Përkthim: Përparim Kalo Alternativa 1993
28. Federata Ndërkombëtare e Komitetit të Helsinkit Autor: Përparim Kalo, Institucioni
botues/publikues: Zëri i Popullit 1991
29. Asambleja Parlamentare e Këshillit të Evropës Autor: Përparim Kalo, Institucioni
botues/publikues: Zëri i Popullit 1991
30. Gjykata e Lartë e Drejtësisë e Komitetit Evropian, Autor: Përparim Kalo,
Institucioni botues/publikues: Zëri i Popullit 1991

35. Mbështetur në këto të dhëna të rezultateve në ushtrimin e detyrës, si dhe në tematikën e përmbajtjen e produkteve profesionale të lidhura me ushtrimin e detyrës apo edhe me ushtrimin e profesionit, Këshilli vlerëson se në aspektin sasior kandidati Përparim Kalo ka tregues të lartë angazhimi profesional, i cili rezulton të jetë dukshëm përtej asaj që mund të gjykohet si një angazhim i zakonshëm apo “mesatar” në ushtrimin e profesionit. Për këto arsye, Këshilli çmoi ta vlerësojë kandidatin Përparim Kalo për këtë kriter ligjor vlerësimi me **5 (pesë) Pikë**.

36. Për sa i përket *vlerësimit cilësor*, Këshilli shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidati Përparim Kalo, veçanërisht pesë prej dokumenteve të përzgjedhura prej tij, me synimin për të evidentuar, bazuar në tregues shkencorë, elementë që dëshmojnë arritjen e rezultateve profesionale, shkallën e këtyre arritjeve, përfshirë elementë që nga këto dokumente profesionalë dhe në tërësi nga veprimtaria profesionale e kandidatit dëshmojnë spikatjen dhe dallueshmërinë e tij në kuptimin dhe qëllimin për të cilin Kushtetuta dhe ligji e përcakton si kusht për vlerësimin e kandidaturës për këtë Këshill dhe, më tej, për përzgjedhjen e gjyqtarit të Gjykatës Kushtetues nga organet e emërtesës.

37. Në veprimet përgatitore të kryera gjatë procedurave të verifikimit të kandidaturës, në datën 18.12.2020, kandidati Përparim Kalo ka njoftuar Këshillin me shkrim se për qëllimet e procedurës së vlerësimit në kuadër të pikëzimit për “*Kualifikimin e Përgjithshëm Profesional*” dhe “*Kualifikimin Shtesë Profesional*”, ka përzgjedhur pesë dokumentet profesionale si më poshtë:

1. “Udhëzues për Debitorin në Procedurat e Falimentit”, një ndër komponentët e projektit të financuar nga IFC (korporata Ndërkombëtare Financiare v. 2020).
2. Mbrojtja e paraqitur si përfaqësues i Republikës së Shqipërisë paditur nga Anglu Adriatic Investment Fund (vendimit të Arbitrazhit i datës 07.02.2019 për çështjen ICSID nr. ARB/17/6 dhënë në favor të Republikës së Shqipërisë).
3. Artikull në analizë Kushtetuese të ligjit nr. 19/2016 “Për një ndërhyrje normative të nxituar dhe jo të mirëmenduar” Revista Avokatia, nr. 19, v. 2018;
4. Ankimi kushtetues (individual) paraqitur në Gjykatën Kushtetuese si mbrojtës ligjor i Vodafone Albania (vendimi nr. 56, datë 25.07.2017, në favor të Vodafone Albania);

5. Opinion ligjor lëshuar për BERZH dhe IFC, për projektin e bashkëfinancimit 100 milionë Euro në favor të OSHEE (financim i kryer në vitin 2012).

38. Në lidhje me tërësinë e dokumenteve profesionale të paraqitura nga kandidati Përparim Kalo dhe, në veçanti, lidhur me pesë dokumentet profesionale të sipërcituara, për realizimin e vlerësimit profesional dhe të pikëzimit përkatës për këtë kriter ligjor vlerësimi, Këshilli shqyrtoi dhe bisedoi në mënyrë të posaçme dhe të kujdesshme përmbajtjen e tyre, duke u mbështetur mbi indikatorë shkencorë, sikurse janë edhe ato të përmendura në Shtojcën nr. 1 të vendimit sipas vendimit nr. 5 datë 02.04.2019 të këtij Këshilli, si edhe orientime që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

39. Dokumentet profesionale të shqyrtuara trajtojnë tematika të ndryshme të fushës së të drejtës më fokus si çështje të drejtësisë kushtetuese ashtu edhe aspekte të ndryshme të fushave të tjera të së drejtës.

40. Njëri ndër indikatorët vlerësues të dokumenteve profesionale është *“Originaliteti dhe/ose impakti (duke përfshirë kontrollin për plagjiaturë) të dokumentit”*. Nisur nga profilet profesionale të kandidatit Përparim Kalo, përmbajtja e dokumenteve të analizuara, tematikës dhe dobisë së përdorimit të tyre nga profesionistë të fushës por edhe nga grupe interesi dhe publiku i gjerë, Këshilli vëren se pesë dokumentet profesionale të shqyrtuara, sikurse edhe në rastin e një numri publikimesh shkencore dhe artikujsh profesionalë, dëshmojnë qasje profesionale origjinale dhe të thelluara të çështjeve ligjore të përzgjedhura për trajtim, për të cilat jo vetëm në kohën e publikimit por edhe aktualisht ka një interes të veçantë për njohje dhe zbatim. Për rrjedhojë, krahas origjinalitetit në përzgjedhjen e tematikave dhe trajtimin e tyre duke sjellë argumente dhe përfundime me interes, vërehet edhe dobishmëria dhe impakti pozitiv i këtyre punimeve në praktikën gjyqësore, në zhvillimin e debatit profesional e doktrinar, si edhe njohjen e të drejtave nga publiku më i gjerë, përfshirë edhe për qëllimet praktike të përdorimit të ligjit në rastet kur mund të pretendojnë njohjen apo kërkojnë mbrojtjen e të drejtave dhe lirive themelore.

41. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin *“Originaliteti dhe/ose impakti (duke përfshirë kontrollin për plagjiaturë) të dokumentit”*, Këshilli vjen në përfundimin se kandidati Përparim Kalo vlerësohet me **6 (gjashtë) Pikë**.

42. Për sa i përket treguesit vlerësues të lidhur me *“Aftësitë analitike”*, Këshilli vëren se posaçërisht pesë dokumentet profesionale të shqyrtuara, sikurse edhe në rastin e një numri publikimesh shkencore dhe artikujsh profesionalë, kandidati Përparim Kalo tregon zotërimin e aftësive të dallueshme për të analizuar informacione dhe për të identifikuar, arsyetuar dhe zbatuar konceptet ligjore, parimet dhe institutet e së drejtës, dispozitat e së drejtës pozitive në trajtimin e çështjeve dhe problematikave që përbëjnë tematikën e punimeve dhe dokumenteve, sipas natyrës dhe qëllimit të vetë këtyre punimeve.

43. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin *“Aftësitë analitike”*, Këshilli vjen në përfundimin se kandidati Përparim Kalo vlerësohet me **6 (gjashtë) Pikë**.

44. Në lidhje me treguesin vlerësues *“Aftësitë kërkimore”*, Këshilli shqyrtoi veçanërisht pesë dokumentet profesionale të përzgjedhura nga kandidati Përparim Kalo, sikurse edhe

publikime shkencore dhe artikujt profesionalë të paraqitur në dosjen e kandidatit. Nga ky shqyrtim, Këshilli vëren se këto punime përmbajnë informacione të larmishme profesionale të përdorura dhe të lidhura efektivisht me natyrën, qëllimin dhe përmbajtjen e secilit prej punimeve të shqyrtuara, të nxjerra nga burime të ndryshme të doktrinës dhe praktikës gjyqësore vendase, si edhe prej atyre të shteteve të ndryshme dhe të institucioneve e gjykatave ndërkombëtare.

45. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin "*Aftësitë kërkimore*", Këshilli vjen në përfundimin se kandidati Përparim Kalo vlerësohet me **4 (katër) Pikë**.

46. Sipas treguesit "*Saktësia dhe precizoni*", në thelb, verifikohet nëse në veprimtarinë e tyre profesionale, kandidatët kanë mbuluar me profesionalizëm tematikën e përzgjedhur dhe materiali ka shmangur përsëritjet apo citimet e panevojshme etj. Nga shqyrtimi i dokumenteve profesionale të përzgjedhura nga kandidati Përparim Kalo, sikurse edhe publikimeve shkencore dhe artikujve profesionalë të paraqitur në dosjen e kandidatit, Këshilli vëren se këto punime tregojnë nivel të lartë dhe të spikatur të përcaktimit të tematikës dhe problemeve juridike për analizë dhe zgjidhje, përdorim të pasur dhe korrekt të terminologjisë juridike dhe strukturim e përdorim në mënyrën dhe vendin e duhur të gjetjeve nga legjislacioni, doktrina, si edhe praktika gjyqësore shqiptare dhe e huaj.

47. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin "*Saktësia dhe precizoni*", Këshilli vjen në përfundimin se kandidati Përparim Kalo vlerësohet me **5 (pesë) Pikë**.

48. Në lidhje me treguesin vlerësues "*Qartësia*", Këshilli shqyrtoi pesë dokumentet profesionale të përzgjedhura nga kandidati Përparim Kalo, sikurse edhe publikime shkencore dhe artikujt profesionalë të paraqitur në dosjen e kandidatit. Këshilli vëren se në këto punime janë të organizuara dhe strukturuar në mënyrën e duhur, gjuha e përdorur është e pasur por njëkohësisht edhe korrekte, e thjeshtë dhe e një niveli të lartë profesional. Pasuria, qartësia e gjuhës së përdorur dhe organizimi i duhur i materialit i bëjnë këto punime të kuptueshme dhe të lexueshme, sipas natyrës së punimit dhe grupeve të interesit të cilave synon ti drejtohet.

49. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin "*Qartësia*", Këshilli vjen në përfundimin se kandidati Përparim Kalo vlerësohet me **4 (katër) Pikë**.

C. Meritat profesionale – Kualifikimi Shtesë Profesional

50. Në shkronjën "b" të pikës 2 dhe shkronjën "b" të pikës 3 të nenit 7/a të ligjit nr. 8577/2000, në shkronjën "b" të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e shtesë profesional, përcaktohen si kriteret vlerësimi që kandidatët të kenë veprimtari të njohur në fushën e të drejtës kushtetuese, të drejtave të njeriut dhe në sfera të tjera të së drejtës, vlerësim të dallueshëm të rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, përvojë të veçantë në një fushë të caktuar të së drejtës, ose këshilltar ligjor i Gjykatës Kushtetuese a Gjykatës së Lartë, si edhe pjesëmarrje të dallueshme në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës.

51. Prandaj, në zbatim të ligjit, në varësi edhe të profileve dhe karrierave profesionale të secilit kandidat, nga totali prej 12 pikësh për këtë kategori vlerësimi, Këshilli i Emërimeve në Drejtësi vlerëson deri në 8 pikë ekspertizën në të drejtën kushtetuese dhe në të drejtat e njeriut ose ekspertizën në fusha të tjera të veçanta të së drejtës. Gjithashtu, Këshilli vlerëson deri në 4 pikë angazhimet profesionale shtesë të kandidatëve. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli, si edhe orientimet në përcaktimin e pikëve përkatëse të merituarra sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

52. Në rastin e kandidatit Përparim Kalo, krahas jetëshkrimit, intervistës dhe motivimit për kandidim, Këshilli shqyrtoi dokumentet profesionale dhe të dhënat që mund të disponoheshin nga veprimtaria e tij profesionale si avokat, si edhe nga kontributet e tjera profesionale të këtij kandidati në veprimtari të ndryshme, përfshirë publikime apo punime e artikuj shkencorë, pjesëmarrjet në veprimtari shkencore dhe veprimtari të tjera profesionale të lidhura me fushat e së drejtës.

Specializimi në të drejtën kushtetuese, të drejtat e njeriut ose në fusha të tjera të së drejtës

53. Për sa i përket kriterit të parë vlerësues, *ekspertizës në të drejtën kushtetuese dhe në të drejtat e njeriut ose ekspertizës në fusha të tjera të veçanta të së drejtës*, nisur nga të dhënat që rezultojnë nga jetëshkrimi, motivimi për kandidim, intervista dhe dokumente të tjera zyrtare mbi rezultate të vlerësimit profesional etj., si edhe nga shqyrtimi i dokumentet profesionale të paraqitura nga kandidati Përparim Kalo, Këshillit i rezulton se historiku dhe karriera profesionale e këtij kandidati është e fokusuar në pjesën dërmuese të kohëzgjatjes dhe shtrirjes të tij në fushën e së drejtës tregtare, por edhe në drejtësisë kushtetuese e fusha të tjera të së drejtës.

54. Këshilli vjen në këtë përfundim jo vetëm nga fakti që veprimtaria profesionale e këtij kandidati është e lidhur për më shumë se 26 vjet me ushtrimin e detyrave profesionale si avokat (ekspert dhe drejtues i studimeve juridike), përvojë, e cila, e lidhur edhe me interesin e dëshmuar vetjak profesional, ka ndikuar në formimin profesional dhe specializimin e këtij kandidati në fushat e së drejtë kushtetuese dhe të drejtave të njeriut, të drejtës civile, etj.

55. Nga ana tjetër, Këshilli vëren edhe se në formimin profesional, specializimin dhe ekspertizën e posaçme profesionale të fituar kandidati Përparim Kalo, një rol të veçantë ka edhe interesi i treguar për ushtrimin e vazhdueshëm të veprimtarive të tjera profesionale me kohë të pjesshme si lektor i jashtëm, trajnues në fushën e së drejtës civile, tregtare si edhe e të drejtave të njeriut. Nga ana tjetër, edhe studimet pasuniversitare të ndjekura me kohë të plotë për afat 3 vjeçar në Suffolk Laë School, Suffolk University, Boston, SHBA janë fokusuar tek çështjet e së drejtës tregtare.

56. Së fundi, si rrjedhojë dhe reflektim i përgatitjes profesionale dhe përvojës së fituar në ushtrimin e detyrave profesionale, në cilësinë e autorit dhe bashkëautorit, kandidati Përparim Kalo ka realizuar edhe një numër të konsiderueshëm punimesh shkencore dhe artikujsh profesionale, të botuara brenda dhe jashtë vendit, të cilat, dhe, në pjesën më të madhe të tyre, trajtojnë çështjet e arbitrazhit, sigurimit, financave, aspekteve të ndryshme të lidhura me njohjen, respektimin dhe mbrojtjen e lirive themelore e të drejtave të njeriut, procesin e rregullt ligjor, raportet kushtetuese mes pushteteve dhe hallkave të tyre etj.

57. Nisur nga kjo veprimtari profesionale, Këshilli vlerëson se kandidati Përparim Kalo dëshmon jo vetëm formimin e tij të plotë juridiko-profesional, por edhe se ka arritur një nivel të spikatur dhe të dallueshëm, jo vetëm teorik por edhe të zbatimit e të ndikimit efektiv në praktikë, të specializimit dhe ekspertizës ligjore, veçanërisht të thelluar në fushën e të drejtës kushtetuese, të lirive themelore e të drejtave të njeriut, si edhe të aspekteve të ndryshme të juridiksionit kushtetues.

58. Prandaj, në lidhje me kriterin vlerësues të *“ekspertizës në të drejtën kushtetuese dhe në të drejtat e njeriut”* Këshilli vlerëson ti caktojë kandidatin Përparim Kalo **7 (shtatë) Pikë**.

Angazhime profesionale shtesë

59. Për sa i përket kriterit të dytë vlerësues, *angazhimeve profesionale shtesë*, krahas të dhënave që rezultojnë nga jetëshkrimi, motivimi për kandidim, intervista dhe dokumentet e tjera zyrtare të administruara në dosjen e kandidatit Përparim Kalo rezulton që për periudhën nga viti 2006 e në vijim, ky kandidat ka marrë pjesë në konferenca shkencore kombëtare dhe ndërkombëtare duke prezantuar punime të tij, ka qenë pjesëmarrës si përfaqësues institucional apo ekspert trajnues në projekte të ndryshme me fokus çështje të fushave të ndryshme të së drejtës.

60. Këto angazhime shtesë profesionale janë të lidhura me kontribute dhe pjesëmarrje në përgatitjen e analizave ligjore dhe studimeve mbi çështje të ndryshme të të drejtave të njeriut, aksesit në drejtësi, garancitë procedurale, të drejta ekonomike dhe sociale, organizimi i institucioneve kushtetuese, mirëfunksionimi i sistemit të drejtësisë, mirëqeverisja dhe funksionimi cilësor i administratës publike, antikorrupsioni, përafrimi i legjislacionit kombëtar me të drejtën e BE-së.

61. Prandaj, duke pasur parasysh këto angazhime shtesë profesionale, të shtrira në kohë dhe me kontribute konkrete profesionale në disa nga fushat më të rëndësishme të së drejtës, Këshilli vlerëson që për kriterin vlerësues të *“angazhimeve profesionale shtesë”*, ti caktojë kandidatin Përparim Kalo **4 (katër) Pikë**.

Meritat Morale

62. Në shkronjën “c” të pikës 2 të nenit 7/a të ligjit nr. 8577/2000 si kriter vlerësimi është përcaktuar që kandidatët të jenë vlerësuar për *“integritetin etik e moral”*. Po kështu, në shkronjën “a” të pikës 1 të nenit 240 të ligjit nr. 115/2016 përcaktohen si kriter *“Rezultatet e vlerësimit të etikës së kandidatëve gjatë punës, nëse ka”*, ndërsa në shkronjat “a” dhe “b” të pikës 2 të këtij neni përcaktohen si kriter vlerësimi edhe *“Reputacioni që gëzon kandidati në shoqëri dhe midis kolegëve”* dhe *“cilësitë morale, të tilla si ndershmëria, përpikëria në ushtrimin e detyrave, drejtësia në marrjen e vendimeve, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi”*. Së fundi, në shkronjën “c” parashikohet si kriter vlerësimi edhe *“angazhimi i provuar në ndjekje të kauzave të shoqërisë civile”*. Në bazë dhe për zbatim të ligjit, lidhur me këto kriter vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

63. Prandaj, në zbatim të ligjit, lidhur me meritat morale, nga totali prej 30 pikësh për të tre komponentët vlerësues, Këshilli i Emërimeve në Drejtësi vlerëson deri në 18 pikë *integritetin etik dhe moral*, deri në 10 pikë *reputacionin që gëzon kandidati në shoqëri dhe midis kolegëve* dhe deri në 2 pikë *angazhimin e provuar në ndjekje të kauzave të shoqërisë civile*. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

64. Në rastin e kandidatit Përparim Kalo, krahas jetëshkrimit, paraqitjes dhe sjelljes gjatë parashtrimeve në intervistë, motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave morale të këtij kandidati.

Integritetin etik e moral

65. Për sa i përket kriterit të parë vlerësues, *integritetit etik e moral*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshilli i rezulton se kandidati Përparim Kalo në veprimtarinë, sjelljen dhe komunikimin e tij tregon përkushtim dhe angazhim të ndërgjegjshëm në përmbushjen e detyrave profesionale dhe në ushtrimin e profesionit, si edhe vëmendje, ndjeshmëri dhe respekt në komunikim e bisedë, duke parashtruar argumentet e tij me dinjitet, duke dëgjuar dhe përgjigjur me kujdesin e duhur, me durim e vetëpërbajtje përkundrejt qëndrimeve dhe pyetjet të cilat i drejtohen nga bashkëbiseduesit.

66. Nga të dhënat e mundshme në dispozicion, Këshillit nuk i rezulton që kandidati Përparim Kalo të ushtrojë apo të ketë ushtruar funksionet e tij profesionale duke favorizuar palë të caktuara apo duke kërkuar përfitime për veten apo për të tjerët. Nuk rezultojnë të dhëna që ky kandidat të mos ketë respektuar detyrimin profesional të nderit dhe të dinjitetit, ndërtimit të marrëdhënieve profesionale dhe mirësjelljes në raport me kolegët, profesionistët e fushës, palët e përfshira në çështje pune etj.. Pra nuk ka të dhëna që me sjelljen dhe veprimtarinë e tij në jetën profesionale dhe personale të ketë cenuar apo të rrezikojë të cenojë imazhin dhe figurën publike të gjyqtarit dhe sistemit të drejtësisë.

67. Prandaj, në lidhje me kriterin vlerësues të "*integritetit etik e moral*" Këshilli vlerëson ti caktojë kandidatit Përparim Kalo **18 (tetëmbëdhjetë) Pikë**.

Reputacionin që gëzon kandidati në shoqëri dhe midis kolegëve

68. Për sa i përket kriterit të dytë vlerësues "*reputacioni që gëzon kandidati në shoqëri dhe midis kolegëve*", nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se kandidati Përparim Kalo në veprimtarinë, sjelljen dhe komunikimin e tij tregon angazhim dhe përkushtim në përmbushjen e detyrave të tij për zbatimin e drejtë të ligjit sipas kompetencave dhe përgjegjësisë që i ngarkon ligji.

69. Sipas të dhënave që disponohen vërehet se kandidati ka ushtruar me seriozitet, maturi dhe besnikëri detyrimet profesionale në ushtrimin e funksionit të avokatit dhe reflekton angazhim të spikatur dhe përgjegjshmëri në angazhimet e tij profesionale jashtë ushtrimit të këtij funksioni. Gjithashtu, Këshilli vëren se nuk ka të dhëna që të tregojnë se ky kandidat në kryerjen e detyrës dhe në jetën personale të ketë kryer veprimtari që rezultojnë përtej kufijve ligjorë në raport me statusin dhe detyrat profesionale të kryera.

70. Prandaj, duke konstatuar se me sjelljen dhe veprimtarinë e tij përmbush pritshmëri për marrjen e përgjegjësiwe ligjore dhe institucionale, si edhe pritshmërinë e publikut për gëzimin e cilëve profesionale e morale për ushtrimin e detyrës së gjyqtarit të Gjykatës Kushtetuese, në lidhje me kriterin vlerësues të *“reputacioni që gëzon kandidati në shoqëri dhe midis kolegëve”* Këshilli vlerëson ti caktojë kandidatin Përparim Kalo **10 (dhjetë) Pikë**.

Angazhimi i provuar në ndjekje të kauzave të shoqërisë civile

71. Për sa i përket kriterit të dytë vlerësues *“angazhimi i provuar në ndjekje të kauzave të shoqërisë civile”*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se, përgjithësisht, kandidati Përparim Kalo ka qenë i angazhuar në veprimtari të tjera të përshtatshme jashtë atyre të lidhura me ushtrimin e detyrës ose të profesionit për ndjekje të kauzave të shoqërisë civile. Konkretisht gjatë intervistës kandidati shprehu se, ndër të tjera, ka qenë i angazhuar në kauzën për mbrojtjen e Valbonës.

72. Përtej vlerësimit të bërë në kriteret e tjera vlerësuese të trajtuara më sipër në këtë vendim, Këshilli vlerëson të evidentojë si kontribute në drejtim të çështjeve të ndjeshme për shoqërinë civile angazhimin e vazhdueshëm të kandidatit jo vetëm në mësimdhënie, por edhe pjesëmarrjen e këtij kandidati për promovimin dhe mbrojtjen e Valbonës, etj.

73. Prandaj, në lidhje me kriterin vlerësues të *“angazhimi i provuar në ndjekje të kauzave të shoqërisë civile”* Këshilli vlerëson ti caktojë kandidatin Përparim Kalo **1.72 (një pikë shtatëdhjetë e dy) Pikë**.

Meritat organizative, drejtuese dhe menaxheriale

74. Në nenin 240 të ligjit nr. 115/2016 parashikohen si kritere vlerësimi disa komponentë të lidhura me aftësitë profesionale dhe personale të kandidatëve mbi çështjet e natyrës drejtuese, organizative, të kapacitetit për vendimmarrje, punës në grup, të komunikimit dhe përfaqësimit publik. Kështu, në pikën 3 të këtij neni parashikohen kriteret vlerësuese për kandidatët si më poshtë:

- “a) cilësinë e platformës dhe të vizionit që paraqesin”;
- b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;
- c) aftësitë e komunikimit;
- ç) aftësitë e të punuarit në grup dhe në ambiente multidisiplinore ose multikulturore;
- d) aftësitë e përfaqësimit publik.”

75. Në bazë dhe për zbatim të ligjit, lidhur me këto kritere vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kritereve.

76. Prandaj, në zbatim të ligjit, lidhur me meritat organizative, drejtuese dhe menaxheriale, nga totali prej 10 pikësh për të pesë komponentët vlerësues të sipërcituar, Këshilli i Emërimeve në Drejtësi vlerëson deri në 3 pikë *cilësinë e platformës dhe të vizionit që paraqesin* kandidatët, deri në 4 pikë *aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*, deri në 2 pikë *aftësitë e komunikimit dhe aftësitë e përfaqësimit publik*, si edhe me 1 pikë për *aftësitë e të punuarit në grup dhe në ambiente multidisiplinore ose multikulturore*. Në arsyetimin dhe përfundimet e tij, Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituarra sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

77. Në rastin e kandidatit Përparim Kalo, krahas jetëshkrimit, paraqitjes dhe sjelljes gjatë parashtrimeve dhe bisedës në intervistë, përmbajtjes së motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave organizative, drejtuese dhe menaxheriale të këtij kandidati.

Cilësia e platformës dhe të vizionit

78. Këshilli shqyrtoi përmbajtjen e dokumentit me shkrim, platformës mbi motivimin e kandidimit dhe vizionit të kandidatit Përparim Kalo lidhur me qasjen dhe qëndrimet e tij mbi rëndësinë dhe aspektet thelbësore të ushtrimit të detyrës së gjyqtarit të Gjykatës Kushtetuese, mbi sfidat kryesore me të cilat është përballur dhe duhet të përballët Gjykata Kushtetuese në ushtrimin e përgjegjësve dhe kompetencave që i ngarkon Kushtetuta dhe ligji, si edhe lidhur me mendimet e kandidatit për çështjet që duhet të trajtohen me përparësi e në perspektivë për mirëorganizimin dhe mirëfunksionimin e kësaj Gjykate, për përballimin e sfidave me të cilat përballët për shkak të mosfunksionimit të tij për një kohë të gjatë, si edhe nisur nga pritshmëritë që lindin nga ndryshimet e kompetencave dhe të juridiksionit në veprimtarinë e kësaj Gjykate. Gjithashtu, në vlerësimin e këtij kriteri, Këshilli mban parasysh edhe parashtrimet dhe shpjegimet e dhëna nga ky kandidat gjatë intervistës dhe në përgjigje të pyetjeve që iu drejtuan nga anëtarët e Këshillit.

79. Nisur nga dokumenti me shkrim dhe shpjegimet e paraqitura gjatë intervistës, Këshilli vëren se kandidati Përparim Kalo paraqiti një nivel të lartë dhe të spikatur të njohjes dhe përvojës profesionale të tij në lidhje me rolin dhe pritshmëritë për ushtrimin e funksionit të gjyqtarit të Gjykatës Kushtetuese, si edhe të kësaj Gjykate në mirëfunksionimin e sistemit demokratik, shtetit ligjor, respektimit të lirive themelore dhe të drejtave të njeriut dhe në tërësi për zhvillimin ekonomik e social të vendit. Gjithashtu, ky kandidat parashtrroi me maturi, në mënyrë profesionale, shumëplanëshe e të hollësishme çështje dhe problematika aktuale dhe të së ardhmes me të cilat duhet të përballët Gjykata Kushtetuese dhe që kanë të bëjnë me thellësinë dhe shpejtësinë në shqyrtimin e çështjeve, me strukturën, organizimin

dhe funksionimin e Gjykatës dhe përmirësimin e burimeve njerëzore, me mënyrat efektive të njohjes dhe afrimit të publikut me veprimtarinë e Gjykatës dhe të vendimeve të tij etj.

80. Prandaj, në lidhje me kriterin vlerësues “*cilësia e platformës dhe të vizionit të paraqitur*” nga kandidatët Këshilli vlerëson ti caktojë kandidatit Përparim Kalo **2.57 (dy pikë pesëdhjetë e shtatë) Pikë**.

Aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore

81. Lidhur me aftësitë e provuara për të marrë vendime dhe përgjegjësi, Këshilli mbështetet pikësepári në të dhënat që lidhen me përvoja konkrete nga karriera e kandidatëve në funksione dhe pozicione të cilat kërkojnë dhe tregojnë marrjen përsipër të përgjegjësisë dhe ushtrimin e vendimmarrjes në ushtrimin e kompetencave dhe përmbushjen e detyrave të ngarkuara. Gjithashtu, në vlerësimin e kandidatëve për këtë komponent vlerësimi, Këshilli mban parasysh se ushtrimi i çdo detyre, funksioni dhe veprimtarie profesionale, edhe kur formalisht nuk lidhet drejtpërdrejt me të drejtën/detyrimin për ushtrimin e kompetencës vendimmarrëse, gjithsesi përmban elementë që tregojnë aftësi të provuara ose premtuese për të marrë nisma, për të kërkuar zgjidhje, për të marrë përgjegjësitë si edhe vendimet e duhura e në kohën e duhur sipas përcaktimeve të ligjit dhe në përgjigje të ndjeshmërisë së publikut.

82. Në rastin e kandidatit Përparim Kalo, krahas jetëshkrimit, parashtrimeve dhe bisedës në intervistë, përmbajtjes së platformës dhe motivimit për kandidim, Këshilli i Emërimeve në Drejtësi shqyrtoi të dhënat nga dokumentet profesionale, si edhe aktet e tjera zyrtare të administruara në dosjen e kandidatit, për të evidentuar të dhëna në lidhje me aftësitë e provuara apo premtuese të këtij kandidati për të marrë vendime dhe përgjegjësi edhe në ushtrimin e funksionit të gjyqtarit të Gjykatës Kushtetuese.

83. Këshilli vëren se kandidati Përparim Kalo, në karrierën e tij profesionale, ka ushtruar për periudhën 1994-2020 funksionin e Avokatit si dhe ka kontribuar dhe ka marrë pjesë në përgatitjen e analizave ligjore dhe studimeve mbi çështje të ndryshme të të drejtave të njeriut, garancitë procedurale, të drejta ekonomike dhe sociale, organizimi i institucioneve kushtetuese, mirëfunksionimi i sistemit të drejtësisë, mirëqeverisja dhe funksionimi cilësor i administratës publike, antikorrupsioni, përafrimi i legjislacionit kombëtar me të drejtën e BE-së.

84. Prandaj, në lidhje me kriterin vlerësues “*aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*”, Këshilli vlerëson ti caktojë kandidatit Përparim Kalo **4 (katër) Pikë**.

Aftësitë e komunikimit dhe aftësitë e përfaqësimit publik

85. Aftësitë e komunikimit, në të gjitha format, veçanërisht me kolegët dhe palët, sikurse edhe në përfaqësimin publik e me të tretët, të shprehurit në mënyrë të qartë, lehtësisht të kuptueshme, të matur, me respekt dhe në mënyrë jodiskriminuese, luajnë një rol të rëndësishëm në kryerjen e funksionit të gjyqtarit të Gjykatës Kushtetuese.

86. Nga shqyrtimi i jetëshkrimit, mënyra dhe stili i parashtrimeve me shkrim të platformës, sjellja, mënyra e komunikimit dhe argumentimit gjatë bisedës në intervistë, si edhe nga përmbajtja, strukturimi dhe stili i hartimit të dokumenteve profesionale të administruara në

dosjen e kandidatit, Këshilli vëren se kandidati Përparim Kalo zotëron aftësi shumë të mirë për të komunikuar me maturi, për të dëgjuar me respekt dhe për tu përgjigjur me profesionalizëm, qartësi e thjeshtësi, me stil dhe gjuhë të pasur në lidhje me të gjitha çështjet dhe problematikat që vlerëson të trajtohen, ashtu edhe për çështje dhe problematika që ngrihen nga të tjerët.

87. Gjithashtu, pa pasur qëllimin dhe pa marrë përsipër të tregojë se dallohet mbi të tjerët, nga materialet me shkrim dhe nga komunikimi e biseda gjatë intervistës, rezulton se ky kandidat zotëron edhe aftësi të spikatur për përfaqësimin publik, pra për të përfaqësuar atë që mendon se është e përbashkët me të tjerë në lidhje me një çështje apo kauzë të caktuar.

88. Prandaj, në lidhje me kriterin vlerësues të *“Aftësitë e komunikimit dhe aftësitë e përfaqësimit publik”*, Këshilli vlerëson ti caktojë kandidatit Përparim Kalo **2 (dy) Pikë**.

Aftësitë e të punuarit në grup dhe në ambiente multidisiplinore ose multikulturore

89. Gjyqtari i Gjykatës Kushtetuese, për vetë natyrën e këtij funksioni, mënyrës së funksionimit dhe kolegjalitetit të kërkuar në veprimtarinë e vendimmarrjen kësaj Gjykate, duhet të zotërojë aftësitë e duhura për një qasje metodike ndaj punës, si dhe aftësinë për të qenë i përfshirë në punën në grup, me gjyqtarët e tjerë, këshilltarët dhe anëtarët e stafit të Gjykatës. Pjesë e kësaj aftësie është edhe nevoja për t'u përshtatur shpejt me zhvillimet e reja, si edhe ndaj nevojës për tu përfshirë në veprimtari në ambiente multikulturale dhe multidisiplinore gjatë karrierës gjyqësore.

90. Nga shqyrtimi i jetëshkrimit, sjellja, mënyra e komunikimit dhe argumentimit gjatë bisedës në intervistë, si edhe nga dokumentet profesionale të administruara në dosjen e kandidatit, Këshilli vëren se kandidati Përparim Kalo zotëron aftësitë e duhura për të punuar në grup, përfshirë atë për të punuar në ambiente multikulturale dhe multidisiplinore. Prezantimi dhe dokumentet profesionale dëshmojnë se ky kandidat është përfshirë vijë mësisht në projekte profesionale me kolegë të tjerë, vendas apo të huaj, për realizimin e publikimeve të shumta shkencore dhe artikujve profesionalë.

91. Gjithashtu, ushtrimi për një kohë të gjatë i funksionit të avokatit si dhe drejtues i një studio avokatore, për vetë mënyrën kolegjinale dhe punën në grup që kërkohet në një zyrë/studio avokatore për përgatitjen e çështjeve dhe përfaqësimin e mbrojtjen e tyre përpara një Gjykate, i kanë mundësuar këtij kandidati fitimin e përvojës dhe shprehive të duhura për punën në grup dhe në çështje e situata të larmishme. Zotërimi i këtyre aftësive rezulton i reflektuar edhe në vetë mënyrën e parashtrimit me shkrim të dokumentave në platformën e paraqitur, si edhe në komunikimin e bisedën e zhvilluar me Këshillin gjatë intervistës.

92. Prandaj, në lidhje me kriterin vlerësues *“Aftësitë e të punuarit në grup dhe në ambiente multidisiplinore ose multikulturale”*, Këshilli vlerëson t'i caktojë kandidatit Përparim Kalo **1 (një) Pikë**.

93. Në përfundim të arsytimit mbi mënyrën dhe shkallën e vlerësimit për të gjitha kriteret ligjore të parashikuara nga ligji dhe të pikëzimit përkatës të treguar më sipër në këtë Vendim, në funksion të procedurave ligjore të përzgjedhjes së gjyqtarit të Gjykatës Kushtetuese dhe për efekt të renditjes së kandidatëve për vendet vakante në të cilat ka kandiduar, Këshillit të Emërimeve në Drejtësi i rezulton se kandidati Përparim Kalo vlerësohet në total me **90.29 (nëntëdhjetë pikë njëzet e nëntë) Pikë**.

PËR KËTO ARSYE:

Në mbështetje të pikës 1 të nenit 125 dhe pikës 1 të nenit 149/d të Kushtetutës, të nenit 7/a, pikës 3 të nenit 7/b të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të nenit 239 dhe 240 të Ligjit nr. 115/2016 “Për organet e qeverisjes së sistemit të drejtësisë”, si edhe të pikës 67 të vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

VENDOSI:

1. Vlerësimin e kandidatit Përparim Kalo me **90.29 (nëntëdhjetë pikë njëzet e nëntë) Pikë**, në lidhje me kandidimin e tij për vendin vakant për gjyqtar në Gjykatën Kushtetuese, të shpallur nga:

- a) Presidenti i Republikës në datën 07.02.2018, rishpallur në datën 27.09.2019 dhe rishpallur në datën 24.09.2020.

2. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

ZV/KRYETARI

Vitore TUSHA

